

¹
EPISTOLÆ FRATRIS

ROGERII BACONIS, B12

DE SECRETIS O-
PERIBUS ARTIS ET NA-
TURÆ, ET DE NULLITA-
TE MAGIÆ. R

Operâ

IOHANNIS DEE LONDI-
NENSIS E PLURIBUS EXEMPLA-
RIBUS CASTIGATA OLIM, ET AD
sensum integrum restituta.

Nunc verò


A QUODAM VERITATIS AMA-
TORE, IN GRATIAM VERÆ SCIENTIÆ
candidatorum foras emissâ; cum notis quibus-
dam partim ipsius IOHANNIS DEE,
partim *factis*.

HAMBURGI,

Ex Bibliopolio FROBENIANO.

ANNO clō. Id. CXVIII.





CLARISSIMIS RESTITUTIONIS
universi Phosphoris, illu-
minatis.

ROSEÆ CRUCIS FRA-
TRIBUS UNA-
MIS:

Gratia & pax multiplicetur, cum firmâ &
perpetuâ protectione Divinâ.



*U*um in Silefiam venissem
anno communis æræ Chri-
stianorum 1597. nihil mihi
potius fuit, quàm ut Johan-
nem Montanum Strigoni-
ensem convenirem; & celebri hominis per-
motus famâ, & maximè quod illa Theo-
phraſti Hobenheimensis scripta, quæ medi-
cinam tractantibus maximo usui eſſe judi-
cabam, ex illius Bibliothecâ in publicum
prodiſſe perſpicerem. Ab illo autem hu-

maniter acceptus adventus causam exposui. Quumq; multi hinc inde jactarentur sermones, ad Heliae Artistæ mentionem tandem delati, interrogavi existimaretne in vivis esse Heliam illum Theophrastæum, à quo omnium scientiarum & artium, maxime verò Chæmiæ & medicinæ restitutio speraretur? Liberiùs hîc suam sententiam professus, asseveranter dixit, & in vivis esse Heliam illum, de quo Theophrastus talia vaticinatur, nec adeo diu illam restitutionem expectandam; sed utram ab uno aliquo viro, an unanimi plurium consensu faciendâ esset illa restitutio clam me habuit. Multa autē insuper addidit divinus ille vir, quæ me in aurem quidem susurrare licet, nisi illius, qui ad ultimam sui abnegationem admittitur. Et quamvis injuriâ quorundam inceptum meum frustra esset, quòd medicinæ relictis studijs aliam vitæ viam inire cōactus sum: tamen quantum victus, & professio-

fessionis meæ ratio pateretur; omni animi
 impetu in rerum cognitionem ferebar: Et si
 quid subsidij aut ex scriptis aliorum, aut pro-
 prijs conatibus nanciscebar, eò omnia refe-
 rebam. Opera namq; Domini magna sunt,
 quæ sita omnibus volentibus ea Psal. III. 2.
 Et hanc negotiationem malam dedit Deus
 filijs Adami, ad affligendum se in ea. Eccles.
 I. 13. Post aliquot annos, apparuit sub nomi-
 ne Heliophili à Percis disquisitio quædam de
 Heliâ Artistâ: in qua etsi auctor disertè qui-
 dem Et nervosè, duorum Jesuitarum ina-
 nes metallicæ metamorphoseos oppugnatio-
 nes rejecerit: argumentum tamen ita pror-
 sus deseruit, ut totius rei fides penes ipsum
 Theophrastum relinqueretur. Anno tan-
 dem 1615. libellus quidam cui titulus Myste-
 rium Arithmeticum emanavit in vulgus,
 quem etsi parum intelligerem; mirabar ta-
 men quinam essent illuminatissimi illi, sapi-
 entissimiq; fratres R.C. quibus est inscriptus.

*certò enim certius persuasi mihi, non posse,
 esse de fece illâ ignavorum fraterculorum,
 animalium Papæ, qui tantis præconijs di-
 gnarentur; qui suæ vocationis quæ sunt, non
 negligerent; qui inventi novi, ardui, admi-
 randi, iudices darentur; qui promissâ chari-
 tate viverent; qui virtutibus exactissimis,
 moribus nil nisi gratiam spirantibus essent
 excultissimi; qui divinâ ingenij claritate,
 perenni sapientiæ fonte, immo & æternæ lu-
 cis candore gauderent; quibus nihil dignius,
 nihil gratius, nihil optatius, possit occurrere.
 Exardebat animus cognoscendi studio, quæ
 tandem esset ista jucundissima bonorum,
 consensio, ad quos preciosissimum illud cha-
 ritatis unguentum in Christi summi sacer-
 dotis caput effusum, tanquam ad oram ve-
 stimentorum, id est membrorum ejus de-
 scenderat: qui illum fidei articulum de Com-
 munionem sanctorum antea tantum credi-
 tum, verè & realiter profiterentur. Anno
 1616.*

1616. amici cujusdam ope aspexi Famam
 fraternitatis cū adnexâ Confessione. Tum
 demum redijt mihi in mentē dictorum Mon-
 tani, tum demum sperabam fore, ut quam
 restitutionē Christus olim incepit in religio-
 ne per predicationem Lutheri; eam humana
 conditionis misertus, etiā in scientijs, & in
 universâ deniq; vitâ acceleraret, tandemq;
 perficeret; ut abolitâ omnium inimicorum po-
 testate; ignorantie, peccati, etiam mortis,
 quæ peccati stipendium est, solus Christus
 regnet in suis (1. Corinth. 15. 25.) ut quod
 precari jubemur, tandem etiam assequa-
 mur; ut veniat regnum ejus, ut fiat volun-
 tas eius sicut in cœlo, sic & in terrâ. Hac e-
 nim illa sunt quæ loquutus est Deus, per os
 omnium qui fuerunt à seculo prophetarum;
 ut nos de manu inimicorum (peccati, tyrannorum,
 mortis, diaboli) liberati: sine timore
 serviamus ei, omnibus diebus vitæ nostræ
 (Luc. 1. 70. &c.) Atq; ista unusquisq; pius


tam scire debet esse futura, quàm certò scit
 verum esse illum qui promiserit. Habetis
 (illuminati fratres) quibus gradibus ad vos
 deductus sum. Et si illi estis quos ego ani-
 mum induxi meum, nihil opus habetis ut e-
 go quicquam de me tester. habetis enim &
 ipse Unctionem à sancto illo quæ vos omnia
 docet. Et quemadmodum illa ipsa vos do-
 cet de omnibus (& de me) in eo manete,
 quia vera est & minimè fallax (1. Job. 2.)
 Noliter mirari (exoptati fratres) quòd
 quum vos omnia sciatis, hanc Rogeriane
 Epistolæ editionem vobis inscripserim: neq;
 enim aliorum feci, nisi ut (quemadmodum
 Fama vestra jubet) desiderium meum &
 observantiam vobis testatam esse percupi-
 am: tum etiam quia plurima hîc sunt apud
 vulgus incognita, quamvis nullo modo si-
 milis vestris sed longo post intervallo, inco-
 gnita tamen; excitare volui studiosorum
 ingenia, ut & crederent plurimas adhuc la-
 tere

têre veritates & rerum abditarum cognitionem sectarentur : ut quam præbetis illucescentis sapientiæ spem, alacrioribus animis amplecterentur.

Valete fratres dilectissimi, meq; summâ animi observantiâ vobis commendatum habete.

In ConfessV sVbsannatorVM
non seDI. Psalm. i.





Lectori pio S.



Achonis hanc Epistolam omnium primus evulgavit Orontius Fineus anno 1542. Simonis Colniæi typis impressam. Corruptissimum videtur fuisse Orontij exemplar, adeo ut verborum contextus

non esset ubiq; obuius. Edidit tamen ne tanto thesauro scientiæ amatores destituerentur: nec sibi assumpsit quicquam vel mutare vel addere; ne sensum auctoris non assequutus ipsius scriptum corrumperet. Hinc postea secundo volumini Turbæ, & reliquorum chymicorum scriptorum adhæsit, servatis etiam ubiq; erroibus. Tandem circa annum 1594. impressa est Oxoniæ hæc ipsa epistola à Iosepho Barnesio: cuius ita avidè arrepta sunt & detenta exempla, ut ne unum quidem ullo studio nancisci possem. Quare quum è bibliothecâ amici cuiusdam istud exemplar à Johanne Dee literatissimo viro, & optimorum auctorum inquisitore diligentissimo è pluribus exemplaribus castigatum, & notis etiam quibusdam illustratum impetrassem: operæ pretium me facturum existimabam, si typis publicis excuderetur. Et quoniam editionis meæ ratio hoc poscuiat, ut famam auctoris vindicem, eluenda mihi videtur in primis illa superstitionis macula, quam Andreas

deas Libavius eius famæ insperfit [Exercit : de philosophiâ Harmonicâ Magicâ fratrum R. C. pag. 301.] Et quamvis illud Libavij scriptum elumbe quidem & malè confarcinatum, responsione indignissimum sit : eò quòd maximâ ex parte aut inanes quasdam & futes suspiciones de fraternitate R. C. excitet, aut viros bonos & de Philosophiâ optimè meritos injustis opprobrijs oneret : tamen quia ipsa sapientia monet [Proverb. 26. 1.] respondendum esse stulto ne sibi sapuisse videatur ; scriptoris omnium ætatum maledicentissimi convitio occurrendum esse arbitrabar. Hic igitur Libavius ne omni turpitudinis maculâ careret Rogerius, à qua intactum neminem fere philosophum dimittit ; eum superstitionis crimine afflavit : non ejus videlicet quæ magi diabolici ; quos merito damnat ; ad impia servitia impuros spiritus allicere credunt ; fatetur enim noluisse Bachonem magiam ; scilicet diabolicam ; probare , qui artis & naturæ potentiam commendavit : [pag. præd.] sed illius fortasse qua falsus Deo cultus , secundum traditiones & præcepta hominum exhibetur pro vero , qui est secundum fidem in purâ conscientia. At ineptè nimium hoc crimen Bachoni quæsitum ivit Libavius. neque enim ab illo religionis dogmata haurimus ; sed quia ; ut hominem philosophum de- cuit ; naturæ vires & potentiam rimatus est : ut naturam sciamus scripta ejus perlegimus. Et si eorum scripta nihili erunt , qui non rectè de religione senserunt ; exulabit omnis ethnicorū philosophia , Hermetis , Aristotelis , Galeni , reliquorum ; exulabit etiam Libavio iudice papistarum. ita quam ille philosophiam summo percupit opere convellere , quamq ;
omni

omni conatu rejectam vellet Paracelsicam nempe & R. C. fratrum, eam necessariò docet adeundam. Aut det igitur Libavius quæ fuerit illa Bachonis superstitio quæ ejus scripta suspecta reddiderit, aut cesset tandem; si potis est; bonorum famam lacerare. Quæ in ipsâ carpserit epistolâ, illis inferiùs ubi occurrent respondetur. Et quia mihi Bachonis hoc scriptum recognoscenti cum Libavio res necessariò est; unum addam quod à R. de Fluctibus qui Libavij rescripto ex professo respondit, prætermissum esse demiror. Et quamvis ad præsens institutum minimè pertineat; tamen quia moram aliquam bonorum animis facere possit, quo minùs cupidè ad illam omnium Restitutionem anhelent, quam fratres, & ante illos alij, non modo affuturam, sed & jam inceptam esse denunciarunt: addam (inquam) aliquid in satisfactionem, sed eâ brevitate quæ præsens institutum decere possit. Etenim nisi antè deliberatum sit & constitutum, fore tandem restitutionem omnium: frustra certè Rosæ Crucis fratres talia proposuissent, & bonos undique viros scripto publicè edito ad suum consortium allexissent. Difficile esse agnosco de rebus futuris judicare, etiam illis quarum indicia ab ipsis sacrosanctis prophetarû scripturis desumuntur. idq; à dilectis D. N. Jesu Christi discipulis videre perfacile est. Nam quamvis per prophetâ Danielem clarè satis minatus esset Deus, se & Ecclesiam, & gentem Judaicam ita abdicaturum, ut post occisum Messiam, & civitatem, & sanctuarium dissiparet populus cum duce venturo: eamq; desolationem usque ad consummationem & finem perseveraturam [Dan. 9. 26. 27.] Omnium tamen Judæorum animos ita præoc-

præoccupaverat illa spes & cogitatio regni Israëliti-
 restituenti, ut Christo à mortuis excitato, ipsi (in-
 quam) discipuli, horum penitus immemores, aut et-
 iam ignari, existimarent jam tum restitutum iri Is-
 raëli regnum [Act. 1. 6.] sic etiam in hunc usq; diem
 cæcutiunt humanæ mentes, semperque cæcutiunt
 ad opera Dei, donec spiritus sancti acceptâ vir-
 tute, tempora rerum & mementa possint dis-
 cernere. Quo minus mirandum est, quum hoc secu-
 lo tot à plerisq; proposita fuerint de rerum omnium
 restitutione, quæ in hanc sententiam afferuntur, à
 nonnullis quidem somniatoribus haberi contem-
 ptui; ab alijs Berrhœensium *Εὐγενης* exemplo,
 ex scripturis quæri num hæc ita se habeant. Fateor
 necesse habere Romanum Antichristum hanc Uni-
 versi restitutionem negare; ut vicariatū suum, quem
 mentitur ad extremam usq; piorum & impiorum re-
 surrectionem perduraturum stabiliat: at hujusce pa-
 pisticæ *ἀποκατάστασις* sordes abstersisset animo Li-
 bavius, nisi sibi assumeret temerario ausu de rebus
 incognitis judicare, & quæ semel rata habuit perti-
 naciter defendere. Sed ut Lectori pio faciā satis, &
 ipsi etiam si velit Libavio: Legantur quæ in proba-
 tionem Restitutionis Universi attulit Gulielmus Po-
 stellus, libro de Nativitate Mediatoris ultimâ im-
 press. Basileæ 1547. Clavis item absconditorū à con-
 stitutione mundi ejusdem Postelli. Item quæ scripsit
 Jacobus Brocardus in Genesin, in Apocalypsin, ali-
 osque sacrarum scripturarum libros, & libri iidem
 de Prophetiâ. Legantur & Thomæ Brightmanni
 Angli commentarij in Cant. Canticorum, Danie-
 lem,

lem, & Apocalypsin, & si vacat etiam quos citat Brocardus: inter quos sunt Martinus Cellarius De operibus Dei impress. Argent. 1527. Et Joachimus abbas circa annum 1200. etiam homil. 13. Henrici Effrhen Argent. editæ 1571. & Fabricij Capitonis commentarij in Hoseam apud Cephaleum Argent. Postellus ex sacrar. scripturarum mysticâ interpretatione rem docet, & duce ratione Brocardus, & Brightmannus, ex interpretatione mysterij, & literæ. At hominum, inquis, sunt hæc commenta & expositiones, petis igitur ut nudum ostendatur scripturarum verbum, & apertus sensus, talem fore omnium reformationem quam fratres R. C. futuram esse denunciant. Et rectè. Nam quum nullum faciat Dominus verbum nisi revelavit secretum suum ad servos suos Prophetas [Amos 3. 7.] à prophetarum scriptis certissima poterunt argumenta sumi de rebus futuris. Quarendum est igitur in primis, quis futurus est in illâ omnium reformatione aut restitutione status sive quæ conditio status illius reformati. Illa autem in tribus potissimum rebus cernetur. Prima erit in ejectione impiorum, ut non apponat ultra magnificare se homo super terrâ [Psal. 10. 18.] sed ut fides Christi, & Ecclesia, per universum terrarum orbem propagetur, Judæis etiam, & Israëlitis rebellibus ad fidem Christi conversis, ut universa anima laudet Iah. Secunda in rerum omnium affluentia & copia. Tertia in bonis animi virtutibus omnibus & scientiâ exaggerati, ut justè, sobriè, piè, & in pace vivatur; quemadmodum ab initio fieri debuit, si Adamus astutiâ diaboli in peccatum non incidisset. Hoc enim est illud quod precari jubemur, ut veniat regnum Dei, ut fiat voluntas ipsius

ipsius sicut in cœlo sic & in terra [Matth. 6. 10.] hic est Sabbatissimus ille qui populo Dei expectandus relinquitur, ut quemadmodum Deus, ita etiam & homo à suis operibus, avaritiâ, superbiâ, injustitia &c. requiescat. [Heb. 4. 9.] Peto autem ab æquis lectoribus, ut ex multis sacr. scripturarum locis quæ huc afferri possent, sine præjudicio hic adnotatos textus serio legant, & diligenter expendant: in quibus si το πᾶν solummodo spectes, nihil potest disertius dici, nihil explicatius. De primo vide Num. 24. 17. Iobi cap. 38. 15. & cap. 40. 7. 8. Psalm. 1. v. 4. 5. 6. & 2. 8. 9. & 9. 5. usq; ad finem. & Psal. 10. totum. & Psal. 22. à versu 27. ad finem. Psal. 33. 8. Psalm. 47. totum. Psal. 66. 1. 2. 3. 4. Psal. 67. totum. Psal. 72. à versu 5. ad finem. Psal. 86. 9. Psal. 96. totum. Psalm. 97. v. 7. ejicientur papistæ cum reliquis idololatræ. Psal. 102. v. 15. ad 23. Psal. 104. 35. Psal. 138. 4. Psal. 145. 21. Isaia cap. 2. 10. ad finem. Is. 54. 5. Ier. 16. 19. Ier. 25. v. 31. 32. 33. Dan. cap. 7. v. 13. 14. 18. 22. Amosi 9. 8. ubi lege secundum hebraicam veritatem. Regnum peccati disperdam de facie terræ. Et ibid. v. 11. 12. Nah. 2. 11. & 3. 8. ad 13. Zach. 9. 10. Matth. 13. 41. & Matth. 24. 14. Luc. 1. 70. ad 76. Act. 3. 21. 1. Cor. 15. 25. Hebr. 2. 8. Heb. 10. 13.

De secundo legantur etiam Psal. 22. 26. Psal. 36. 8. Psal. 67. 6. Psal. 85. 12. Psal. 107. 35. ad finem. Psal. 144. versu 12. ad finem. Ez. cap. 34. 26. 27. Hos. cap. 2. v. 21. 22. Amos. 9. 13.

De tertio. Psalm. 25. 9. & 12. Isa. 11. v. 6. ad 10. Isa. 54. 13. 14. Isa. 65. 16. & seq. Ier. 31. 31. Dan. 12. 4. Hos. 2. 18. 19. 20. Mic. 4. 3. 4. Matth. 10. 26. Iohan. 6. 45. Hebr. 4. 9. 10.

De secundo & tertio, legatur isidem Isaia cap. 2.

vers. 1. ad 6. & Ioelis cap. 2. v. 21. ad finem. copiose autem ista omnia describuntur Esdræ. lib. 4. si legere vacat attentè, & considerare.

De Israëlitis autem ad Ecclesiam Christi aggregandis, & in suam terram restituendis legantur Gen. cap. 13. v. 15. Num. 23. 23. & confer cum. Ier. 16. 14. 15. Isa. 11. v. 11. ad finem. & cap. 27. 12. 13. & cap. 60. per totum. Ier. 23. 3. ad 9. Ier. cap. 30. & cap. 31. per totum. & cap. 32. v. 37. ad finem. Ezech. cap. 20. v. 40. ad 45. Ezech. cap. 34. 11. ad finem. Ezech. cap. 36. & cap. 37. Hos. 1. v. 10. 11. & cap. 3. per totum. Amos 9. 14. Obad. 17. ad finem. Mich. 2. 12. & 4. 6. ad finem. Nah. 3. 13. ad finem. Zach. 2. 4. & Zach. 8. per totum. & 10. 3. ad finem. & 12. 6. ad finem. Luc. 1. 33. Rom. 11. 24. ad finem. De Turcâ etiam per Israëlitas in terrâ Canaan funditus excindendo, legatur Ezech. cap. 38. & cap. 39. Ioëlis cap. 3. 9. ad finem. Zach. 9. 13. ad finem. & confer Apoc. cap. 6. v. 12. ad 17. & Apocal. cap. 19. v. 11. ad finem. post quod est Sabbatismus de quo Apoc. 20. ad v. 7. Interea verò omnis Christianorum conatus in Turcam irritus fuit, est, & erit, propter idololatriam in secundo concilio Niceno stabilitam anno 781. Etenim in illius sceleris vindictam; Universam orientis imperium Deus zelotypus Turcæ tanquam stipendium concessit, ut olim Nabuchodonosori servo suo Ægyptum, propter Tyrum everfam. Conferat etiam Roma Isa. cap. 13. & 14. ad v. 24. & Ezech. cap. 27. & 28. cum Apoc. 18. & videat ex Babylone, & Tyro, quid expectare debeat. Deniq; quod 1. Paral. cap. 39. v. 29. 30. dicitur in libris Samuelis, Nathani, & Ghad, descripta esse Davidis gesta, & regni ejus, & fortitudinis, & temporum quæ tran-

transierunt super eum, & super universa regna terrarum: id multò magis locum habet in universis prophetarum scripturis; qui quidem per spiritum Christi qui in ipsis erat, scrutantes illas Christi passiones, & subsequuturas deinde glorias [1. Pet. i. ii.] ita universae Ecclesiae statum, & aetates, & gesta, & tempora descripserunt: ut non immerito Christus Dominus de se ipso praedicarit [Isaia cap. 46, 10.] Annuncio ab exordio novissimum, & ab initio quae nondum facta sunt. verum ut singula rectè intelligantur, necesse est ut eodem Christi spiritu, quo scripta sunt legantur. id autem in sabbatismo sive in restitutione universi fiet, quum repleta erit terra scientia Domini, sicut aquae mare operientes. tum enim ab omnibus, uniuscujusque literae & apicis in sacro contextu, ultima ratio reddi poterit. ad nostrum enim usum descriptus est, idque dum in via sumus, ut perfectus sit vir Dei, & ad omne opus bonum instructus. Afferit contra Libavius: Quod ad humana attinet politicae leges sive imperij, & regnorum Christianorum; sive gentilium, hujusmodi reformationem non passuras: Oblitus penitus quod in Mose dixerit Deus, Deut. cap. 18. v. 18. 19. & Act. 3. 23. Exterminatum iri omnem animam de populo, qui Christum [in Ecclesia loquentem] non audierit. Est enim haec gloria omnibus sanctis ejus, ad faciendam vindictam in nationibus, increpationes in populis: ad alligandos reges eorum in compedibus, & nobiles eorum in manicis ferreis Psal. 149. *Philosophia autem & medicina accessu luminis scripturae & Hermeticae solertiae in chymicis, magnam ex parte correctam est.* Utinam ex animo hoc diceres & verè Libavi. vera certè est quae inde petitur philosophia, at

verò ut adhuc fuerunt hominum ingenia è puteis Aristotelis & similium demersa veritas extracta est. Medicina fateor, ex chymica industriâ nonnullis salutaribus experimentis ornata est; at plurimis etiam & periculosis, & incertis ita deformata, ut nihilo sit quàm antè correctior. Quis autem medicinam præclaris illis chymicis medicamentis instruxit? non magus Paracelsus, non Artefius, non Crollius, aut similia diaboli (vide pag. 290: & immanè hominis superbiam agnoscas: qui se supra Dei solium extollere non erubescit, & illos cum Simone mago &c. amandare diabolo, pro quibus mortuus est Christus. vid. Rom. 14. 4. Matt. 7. ad 6.) pecora: hoc enim Libavio nefas dicere. Quis igitur? Andreas ipse Libavius; corralis undecunq; & emendicatis experimentis; Alchymiam nobis & Arcanorum syntagma adornavit. ô correctâ medicinam! ô castigatos & flagellatos medicos! In divinis autè duplex cõceditur reformatio: una quum gentes idola averfatæ Christi fidem amplexæ sunt: Altera quæ ministerio Lutheri peracta est. inceptam quidem Libavi concedimus, sed non peractam. idq; etiam & ipse quem affers scripturæ locus [2. Thes. 2. 8.] potuit luculentius indicasse. *Quem absument Dominus spiritu oris sui, & abolebit in claritate adventus sui.* Quod sit illud Iniquitatis mysterium, non ambigitur inter nos. quæ etiam fuerint ejus initia, qui progressus, concordamus. quanto studio illi reclamatum est in omni ætatè, quàm fèrale bellum sanctis indixerit, & quomodo in illos ita prævaluerit, ut duos etiam testes, verbum scilicet Euangelicum & propheticum per traditiones & falsa interpretamenta occiderit, abundè satis ab historijs Ecclesiæ, & nomi-


natum

nātim à Jacobo Usserio, qui hoc argumentum ex professo tractavit, edisci potest. Quum verò omnes illos aut vi, aut fraude subverterit Romanus Antichristus, qui illi quomodolibet resisterunt, usque ad Lutherum : tum demum inceptus est absumi, quum per Lutherum & cæteros qui fidelem religioni navabant operam, fides & veritas Christi paterent omnibus, quæ ita penitus exulabant, ut in illo adventu filij hominis fides in terris vix inveniretur. Sed quamvis tum primum cæptus sit absumi spiritu oris Christi, id est verbo eius, quod quidem illum adhuc absumit, & indies absument : restat tamen adhuc facienda abolitio in illustratione adventus, quando Papa, & Papistæ, cum reliquis impijs, gentilibus, & pseudo-christianis ejicientur. Triplex igitur ex sacris scripturis est adventus Christi. De primo in carne, de ultimo in gloriâ nulla est quæstio apud nos. De secundo autem qui est in spiritu, Romanus pontifex Christiano orbi ita illusit, ut à paucissimis agnoscatur. Quum tamen hæc magna pars sit gloriæ illius, quæ passioni erat subsequutura; sponsam quidem veram semper decuit, & sponsi causa hunc adventum expetivisse, ut illi flecteretur omne genu, & omnis lingua confiteretur Deo [Rom. 14. 11.] & etiam suâ, ut spiritus sanctus in omnem carnem effunderetur; cujus quidem illustre specimen & argumentum statim post Dominum in celos evectum, in apostolis factum est; & ut reliqua illa gloriosa quæ de civitate Dei prædicantur, ad perfectam ipsius & perpetuam beatitatem apparerent. Objicitur. Omnem illam Ecclesiæ felicitatem de cœlesti gloriâ in figuris dici: interea verò crucem esse tollendam, probra & afflictiones tole-

randas. At distinguenda sunt Ecclesiæ tempora. Est enim omnibus tempus determinatum: tempus occidendi, & tempus medendi: tempus fiendi, & tempus ridendi. [Eccles. 3.] fuit quidem tempus quum iudicium à domo Dei fieri inciperet, quum ipsum patrem familias non tantum convitijs proscinderent, sed & in crucem tollerent: quum apostoli & martyres *τὰ ὑπερήματα* afflictionum Christi implerent, sed hoc pro reliquo corpore, ut qui seminant in lachrymis, in exultatione metant. Jam verò hyems præterijt, & messis tempus adest, ut Ecclesiam affligentibus reddatur duplum, ut omnibus Christi adventum expectantibus, omnis lachryma abstergatur. Quod autem in typis huiusmodi, æternæ vitæ gaudia proponuntur, verissimum esse concedo. Sed ut typi sint, necesse etiam est ut sint, aut certè non possunt esse typi: quemadmodum optimè disputat Jac: Brocardus lib. I. de prophetiâ; ad quem, & reliquos antè citatos auctores, lectores harum rerum cupidos ablegabo; illud primum & ultimum adnotatus, ut firmum habentes sermonem propheticum; illi attendant, donec dies elucescat, & phosphorus exoriatur in cordibus eorum.

In ConfessV sVbsannatorVM
non seDI. P S A L. I.

EPISTO-



EPISTOLA FRATRIS
 ROGERII BACONIS,
DE SECRETIS OPER-
RIBUS ARTIS ET NA-
TURÆ, ET DE NULLI-
tate Magiæ.

CAPUT I.

*De & contra apparentias fictas, &
 de & contra invocationes spi-
 rituum.*

Mestra petitioni respondeo
 diligenter. Nam licet na-
 tura potens sit & mirabilis;
 tamen ars utens naturâ pro
 instrumento, potentior est virtute na-
 turali, sicut videmus in multis. Quic-
 quid autem est præter operationem
 naturæ vel artis, aut non est huma-
 num, aut est fictum & fraudibus occu-
 patum.

patum. Nam sunt qui motu veloce, membrorum apparentia fingunt, aut vocum diversitate, aut instrumentorum subtilitate, aut tenebris, aut consensu multa mortalibus proponunt miranda, quæ non habent existentiae veritatem. his mundus plenus est, sicut manifestum est inquirenti. Nam joculariores multa manum velocitate mentiuntur, & Pthyonissæ vocum varietatē in ventre, & gutture fingentes, & ore, formant voces humanas à longè vel propè prout volunt, ac si spiritus cum homine loqueretur; etiam sonos brutorum confingunt. Cannæ verò graminis subditæ, aut latebris terræ conditæ, ostendunt quod vox humana est, & non spiritus, quæ magno fingunt mendacio. Quū verò in tenebris crepusculi matutinis vel nocturnis res inanimatæ moventur violenter; non est veritas, sed fraus & dolus. Consensus verò omnia fingit quæ volunt homines, prout adinvicem disponunt. In his verò omnibus, nec philosophica ratio considerat,

derat, nec ars, nec potestas naturæ tenet. Sed præter hæc, nequior est occupatio, quando homo contemnit leges philosophiæ, & contra omnem rationem spiritus invocat nefarios, ut per eos suam compleat voluntatem. Et in hoc est error, quod credit sibi subjici spiritus, & quod spiritus cogantur humanâ virtute; hoc enim impossibile est. quia vis humana longè inferior est quàm spirituum. Atque in hoc magis aberrant hujusmodi homines qui per aliquas res naturales quibus utuntur, credunt vel advocari, vel fugari spiritus malignos. Et adhuc errant, quando per invocationes, deprecationes, & sacrificia nituntur homines eos placare, & adducere pro utilitate vocantium. Facilius enim sine comparatione à Deo impetrādū foret, vel à bonis spiritibus, quicquid homo debet utile reputare. Sed nec in rebus inutilibus favorabiles assistunt spiritus maligni, nisi in quantum propter hominum peccata à Deo permittuntur, qui humanum genus

regit & gubernat. Et ideo istæ viæ sunt præter sapientiæ documenta, imo potius in contrarium operantur, nec unquam verè philosophantes de his sex modis curaverunt.

CAPUT II.

De characteribus, carminibus, & eorum usu.

Quid verò de carminibus, & characteribus, & hujusmodi alijs sit tenendum, considero per hunc modum. Nam proculdubio omnia hujusmodi nunc temporis sunt falsa, aut dubia: & quædam sunt irrationabilia: quæ philosophi adinvenerunt in operibus naturæ & artis, ut secreta occultarent ab indignis. Sicut si omnino esset ignotum quod magnes traheret ferrum, & aliquis volens hoc opus perficere coram populo, faceret characteres, & carmina proferret, ne perciperetur quod totum opus attractionis esset naturale. Sic igitur quam plurima in libris

bris philosophorū occultantur multis modis : in quibus sapiens debet hāc habere prudentiā, ut carmina & characteres negligat, & opus naturæ & artis probet : & sic tam res animatas, quā inanimatas videbit ad invicē cōcurrere, propter naturę conformitatē, non propter virtutē carminis, vel characteris. Et sic multa secreta naturę & artis existimantur ab indoctis mágica. Et magi confidunt stultē carminibus & characteribus, quod ijs præbeant virtutem ; & pro assecuratione eorum relinquunt opus naturæ vel artis, propter errorem carminum & characterum. Et sic utrumque genus hominum istorum priyatur utilitate sapientiæ, suā stultitiā cogen-
te. Sunt autē quædā deprecationes antiquitus institutæ ab hominib. virtutis, aut veritatis, aut magis à Deo & angelis ordinatæ ; & huiusmodi virtutē suā primā possunt retinere. Sicut in multis regionibus adhuc quædam orationes fiunt super ferrum candens, & super aquam fluminis, & similiter alia, in quibus

Num. 6.

27.

Num. 5.

bus innocentes probantur, & rei damnantur: & auctoritate Ecclesiæ fiunt & prælatorū. Nam & ipsi sacerdotes exorcismos faciunt in aqua benedictâ, sicut in lege veteri de aquâ purgationis legitur quâ probatur adultera, vel fides suo viro, & multa sunt hujusmodi. Sed quæ in libris Magicorum continentur; omnia sunt jure arcenda, quamvis aliquid veri contineant: quia tot falsis involvuntur, ut non possit discerni inter verum & falsum. unde quicumque dicunt quod Solomon composuit hoc vel illud, aut alij sapientes, negandum est. quia non recipiuntur hujusmodi libri auctoritate Ecclesiæ, nec à sapientibus, sed à seductoribus qui mundum decipiunt: etiam & ipsi novos libros componunt, & novas ad inventiones multiplicant, sicut scimus per experientiam: & ut vehementius homines alliciant titulos præponunt famosos suis operibus, & eos magnis auctoribus ascribunt impudenter: ac ut nihil omittant de contingentibus, stilum

lum grandisonum faciunt, & sub formâ textus mendacia sua confingunt. Characteres verò aut sunt verba figuris literarū involutis compositi, cōtinentes sensum orationis adinvētæ; vel sunt facti ad vultus stellarū in temporibus electis. De characteribus igitur primo modo sic judicandū sicut de orationib. dictum est: de sigillis autem & characteribus secundo modo nisi fiant temporibus electis, nullam efficaciam penitus habere noscuntur. Et ideo qui facit ea sicut in libris formantur, non respiciens nisi solam figuram quam repræsentat exemplar, nihil facere ab omni sapiente judicatur. Qui autem sciunt in constellationibus debitis opera facere ad vultus cœlorum; illi non solum characteres, sed omnia opera sua possunt disponere, tam artis, quàm naturæ secundum cœli virtutem. Sed quia difficile est in his certitudinem cœlestium percipere: ideo in his multus est error apud multos: & pauci sunt qui sciunt aliquid utiliter & veraciter

citer ordinare. Et propter hoc, vulgus mathematicorum judicantium & operantium per stellas, non multum perficiunt, aut aliquid utile faciunt: quamvis peritissimi, & artem sufficienter habentes, possent multas utilitates facere tam per opera, quam per judicia in temporibus electis. Considerandum tamen quia peritus medicus, & alter quicumque habet animam excitare; carmina & characteres licet fictos utiliter (secundum Constantinum medicum) potest adhibere. non quia ipsi characteres aut carmina aliquid operentur: sed ut devotius & avidius recipiatur medicina, & animus patientis excitetur, & confidat liberius, & speret, & congaudeat, quoniam anima excitata potest in corpore proprio multa renovare; ita ut de infirmitate in sanitatem convalescat, ex gaudio & confidentia. Si ergo medicus ad magnificandum opus suum, ut patientis excitetur ad spem & confidentiam, aliquid hujusmodi faciat; non propter fraudem,

dem, sed propter hoc ut confidat quod revaleat (si credimus medico Constantino) non est abominandum. Nam ipse de his quæ suspenduntur ad collum, sic concedit ad collum carmina, & characteres & eos in hoc casu defendit. Nam anima multum potest super corpus suum, per suas affectiones fortes, ut docet Avicenna in lib. de Animâ. & 8. de animalibus, & omnes sapientes concordant. Et ideo fiunt coram infirmis ludi, & res delectabiles afferuntur: immo aliquando appetitui multa conceduntur contraria: quia vincit affectus, & desiderium, & animæ spes supra morbum.

CAPUT III.

De virtute sermonis, & redargutione magiæ.

Quoniam verò in nullo lædenda est veritas, oportet diligentius considerare, quod omne agens facit virtutem & speciem à se, in materiam extrin-

trinfecam ; non solum substantiæ, sed
 accidentia activa de tertiâ specie qua-
 litatis. & fiunt virtutes à rebus, aliqua
 sensibiles, aliqua insensibiles. Et ideo
 homo potest facere virtutem & speci-
 em extra se, maximè quum sit nobilior
 alijs rebus corporalibus, & præcipuè
 propter dignitatem animæ rationalis,
 & nihilominus exeunt spiritus & calo-
 res ab eo, sicut ab alijs animalibus. Et
 nos videmus quod aliqua animalia im-
 mutant & alterant res sibi objectas, sic-
 ut *a* basiliscus interficit solo visu, & *b*
 lupus reddit raucum, si prius videat ho-
 minem, & *c* hyæna intra umbram su-
 am canem non permittit latrare, sicut
 Solinus de mirabilibus mundi narrat,
 & alij auctores. & Aristoteles in libro
 secundo de Vegetabilibus dicit, palma-
 rum foeminarum fructus maturesce-
 re per odorem masculorum. & equæ
 imprægnantur in aliquibus regnis per
 odorem equorum, ut *d* Solinus narrat.
 & multa alia contingunt, per species
 & virtutes animalium, & plantarum ;
 multa-

*a) Plin.
 hist. nat.
 lib. 39.*

cap. 4.

*b) Plin.
 lib. 8. c.*

*22. Soli-
 ni Poly.*

cap. 8.

*c) Plin.
 lib. 8.*

cap. 30.

*Solin. cap
 30.*

d) cap.

26. ex C.

Plinij lib.

4. c. 32.

E lib. 8.

cap. 42.

multaq; mirabilia sicut Aristoteles dicit in libro Secretorum. Quum ergo plantæ & animalia non possint attingere ad dignitatem humanæ naturæ; homo multò magis poterit facere virtutes & species, & colores emittere ad alterationem corporum extra se: propter quod dicit Arist. in lib. de somno & vigilia, quod mulier mēstruosa si adspexerit speculum, inficit ipsum, & apparet in eo nubes sanguinis. Et Solinus narrat: In Scythia sunt mulieres habentes geminas pupillas in uno oculo (unde Ovidius: nocet pupilla duplex) quæ quum irascuntur interficiunt homines solo visu. Et nos scimus quod homo malæ complexionis, & habens infirmitatē contagiosam, ut lepram, vel morbum caducum, vel febrem acutam, vel oculos multum infirmos, vel hujusmodi, inficit alios præsentēs & contaminat. è contrario homines bene complexionati & sani, & maxime juvenes, confortant alios, & homines gaudent ex eorum præsentia. & hoc est propter spiri-

e) Cap. 6.

Vide &
C. Plin.
hist. nat.
lib. 7.
cap. 20.

spiritus suaves, & vapores salubres & delectabiles, & naturalem colorem bonum, & propter species & virtutes quæ fiunt ab ijs, sicut Galenus docet in Technè. Et augetur malum si anima sit peccatis magnis & multis corrupta, habens corpus infirmum, & malæ complexionis, & sit cogitatio fortis, & desiderium vehemens ad nocendum & malignandum. Nam natura complexionis & infirmitatis obedit cogitationibus animæ, & desiderijs, & fortius agit. Unde leprosus qui ex desiderio forti, & cogitatione, & sollicitudine vehementi, intenderet alium præsentem inficere: & citius & fortius ipsum inficeret, quam si ad hoc non cogitaret, nec desideraret, nec intenderet. Naturæ enim corporis (ut Avicenna docet locis prædictis) obedit cogitationibus, & vehementibus desiderijs animæ. Nam (sicut Avicenna docet tertio Metaph.) primum movens est cogitatio, deinde desiderium conformatum cogitationi; postea virtus naturalis in-

mem-

membris quæ obedit desiderio & cogitationi: & hoc in malo (ut dictum) & in bono similiter. Unde quum in homine inveniuntur hæc: scilicet bona complexio, & sanitas corporis, & juventus, & pulchritudo & elegantia membrorum, & anima munda à peccatis, & cogitatio fortis, & desiderium vehemens ad aliquod opus magnum, tum quicquid fieri potest per speciem & virtutem hominis, & spiritus, & calorem naturalem, necesse est quod fortiùs & vehementiùs fiat per huiusmodi spiritus, [al. species] & vapores, & influentias; quam si aliquod istorum deficeret: & præcipuè si desiderium, forte & intentio valida non desit. Et ideo per verba, & opera hominis, possunt aliqua magna fieri: quando omnes dictæ causæ concurrunt. verba enim sunt ab interioribus per cogitationes animæ & desiderium, per motum spirituum, & calorem, & vocalem arteriam: & eorum generatio habet vias apertas, per quas est magnus exitus

C

spiri-

spirituum, & caloris & evaporationis, & virtutis, & specierum quæ possunt fieri ab animâ & corde. Et ideo alterationes fiunt à partibus per verba, secundum quod ijs debetur ex potestate naturæ. videmus enim quod per huiusmodi vias apertas à corde & interioribus, anhelitus, & oscitatio, & multæ resolutiones spirituum, & caloris fiunt : quæ aliquando nocent, quū ab infirmo, & malæ complexionis corpore proveniūt : & prosunt, & confortant quum à corpore mundo, sano, & bonæ complexionis producantur. Et ideo similiter aliquæ operationes magnæ naturales possunt fieri in verborū generatione & prolatione, cum intentione & desiderio operandi. Unde non immerito dicitur quod vox viva magnā habet virtutē : non quia illā habet virtutē quā magici fingunt, nec non similiter ad faciendum & alterandum (ut existimant) sed secundum quod natura ordinavit. Et ideo valde cautē in his intendendum est. Nam
de

de facili homo potest errare, & multi errant in utramque partem, quoniam aliqui omnem operationem negant; & alij superfluunt; & ad magicam declinant. Multi igitur libri cavendi sunt propter carmina & characteres, & orationes, & conjurationes, & sacrificia, & hujusmodi quia purè magici sunt. Ut liber de Officijs spirituum, liber de morte animæ, liber de arte notoriâ, & hujusmodi infiniti: * qui nec artis, nec naturæ continent potestatem, sed figmenta magicorum. Considerandum est etiam quia multi libri reputantur inter magicos qui non sunt tales, sed continent sapientiæ dignitatem. qui igitur sunt suspecti, & qui non, experientia cujuslibet sapientis docebit. Nam si quis in aliquo illorū opus naturæ, vel artis inveniat, illum accipiat: si non, relinquat velut suspectum, & sicut indignū & illicitū sapienti. quia magici est pertractare sic superfluum, nec necessarium. Nam (ut sensit

*Defuit in
alio exempli*

Isaac in lib. de febribus) anima rationalis non impeditur in suis operationibus nisi detineatur ignorantia. Et Aristoteles vult in libro secretorum, quod intellectus sanus & bonus potest in omnia quæ hominī necessaria sunt, cum influentiā tamen divinæ virtutis. Et tertio Meteororū dicit, quod non est virtus nisi per Deum. Et in fine Ethicorum dicit, quod nulla est virtus nec moralis nec naturalis sine influentia divinā. Unde quum loquimur de potestate agentium particularium, non excludimus regimen agentis universalis, & primæ causæ. Nam omnis causa prima plus influit in causatum quàm secunda, ut prima propositio de causis proponit.

CAPUT IV.

De instrumentis artificiosis mirabilibus.

NArrabo igitur nunc primò opera artis & naturæ miranda, ut postea causas

causas & modos eorum assignem: in quibus nihil magicum est, ut videatur quòd omnis potestas magica sit inferior his operibus & indigna. Et primò per figurationem solius artis. Nam, instrumenta navigandi possunt fieri sine hominibus remigantibus, ut naves maxime fluviales & marinæ ferantur unico homine regente, majori velocitate quàm si essent plenæ hominibus navigantibus. Currus etiam possent fieri ut sine animali moveantur cum impetu inæstimabili, ut existimatur currus falcati fuisse, quibus antiquitus pugnabatur. Possunt etiam fieri instrumenta volandi, ut homo sedens in medio instrumenti revolvens aliquod ingeniū, per quod alæ artificialiter compositz aërem verberent, ad modum avis volantis. Fieri etiam potest instrumentū parvum in quantitate ad elevandum & deprimendum pondera quasi infinita, quo nihil utilius est in casu. Nam per instrumentum altitudinis trium digitorum, &

latitudinis eorum, & minoris quantitatis, posset homo seipsum & socios ab omni periculo carceris eripere, & elevare, & descendere. Potest etiam de facili fieri instrumentum quo unus homo traheret ad se mille homines per violentiam ipsis invitis; & sic de rebus alijs attrahendis. Possunt etiam fieri * instrumenta ambulandi in mari, & in fluvijs ad fundum sine periculo corporali. Nam Alexander magnus his usus est, ut secreta maris videret, secundum quod Ethicus narrat astronomus. Hæc autem facta sunt antiquitus, & nostris temporibus. & certum est, præter instrumentum volandi quod non vidi, nec hominem qui vidisset cognovi, sed sapientem qui hoc artificium excogitavit explicitè cognosco. Et infinita alia possunt fieri, ut * pontes ultra flumina sine columnâ, vel aliquo sustentaculo, & machinæ, & ingenia inaudita.

CAPUT

CAPUT V.

De experientijs perspectivis artificialibus.

SED profecto mirandæ satis inveniuntur figurationes physicae radiorum. Nam sic possunt figurari perspicua & specula, ut unum appareat multa, & unus homo exercitus; & ut plures & quot volumus Soles & Lunæ appareant. Nam natura sic aliquando figurat vapores, ut duo Soles, & duæ Lunæ, & aliquando tres Soles apparuerint simul in aëre, ut Plinius recitat in 2. naturalis historiæ. Et quæ ratione plures & infinitæ potest unæ res apparere: quia postquam excedit suam virtutem, nullus est ei numerus determinatus sicut arguit Aristot. in cap. de vacuo. Et sic omni civitati, & exercitui contrario, possunt fieri terrores maximi: ut vel propter multitudinē apparitionum stellarum, vel

Cap. 36

hominum super ipsos congregatorum
dispereant ; præcipuè si sequens do-
cumentum cum illo primo habeatur.
possunt enim sic figurari perspicua ut
longissimè posita appareant propin-
quissima, & e contrario ; ita quod ex in-
credibili distantiâ legeremus literas mi-
nutissimas, & numerarem res quan-
tumcunq; parvas, & stellas faceremus
apparere quò vellemus. Sic enim exi-
stimatur quod Julius Cæsar per littus
maris in Gallijs, deprehendisset per
ingentia specula dispositionem & si-
tum castrorum & civitatum Britan-
niæ majoris. Possunt etiam sic figura-
ri corpora, ut maxima appareant mi-
nima, & e contrario : & alta appareant
ima & infima, & e contrario : & occulta
videantur manifesta. Nam ut So-
crates draconem corrumpentē civi-
tatem & regionem suo anhelitu & in-
fluentiâ pestilenti, deprehendit intra
montium latibula residere : Sic etiam
omnia quæ essent in civitatibus & ex-
ercitibus contrarijs possunt ab inimi-
cis

cis deprehendi. Possunt etiam sic figurari corpora, ut species & influentiæ venenosæ & infectivæ ducerentur quo vellet homo: nam sic Aristoteles fertur docuisse Alexandrum. quod documento venenum Basilisci erecti super murum civitatis contra exercitum, deduxit in ipsam civitatem. Possunt etiam sic figurari perspicua, ut omnis homo ingrediens domum, videret veraciter aurum, & argentum, & lapides pretiosos, & quicquid homo vellet, & quicumque festinaret ad * visionis locum nihil inveniret. Non igitur oportet nos uti magicis illusionibus, quum potestas Philosophiæ doceat operari quod sufficit. Sed de sublimioribus potestatibus figurandi est, quod ducantur & congregentur radij per varias fractiones, & reflexiones, in omni distantia qua volumus, quatenus comburatur quicquid sit objectum. nam hoc testantur perspicua comburentia antè & retro, sicut auctores certi docent in suis libris. Et

*Al. visitat
re.*

majus omnium figurationum & rerum figuratarum est, ut cœlestia describerentur, secundum suas longitudo-
dines & latitudines in figurâ corporali, quam moventur naturaliter motu diurno: & hæc valeret regnum unum homini sapienti. Hæc igitur sufficiant pro exemplo figurationum, quamvis infinita alia miranda proponi possent in medium.

CAPUT VI.

De experimentis mirabilibus.

HIS verò sunt quædam annexa sine figurationibus. nam in omnem distantiam quam volumus, possumus artificialiter componere ignem comburentem ex sale petraë & alijs. Item ex oleo petroleo rubro & alijs. Item ex maltha & naphtha & similibus, secundum quod Plinius dicit in libro 2. cap. 104. civitatem quandam defendisse contra exercitum Romanum

num : nam maltha projecta combus-
sit militem armatum. His vicinus
est ignis Græcus, & multa comburen-
tia. Præterea possunt fieri lumina per-
petua & balnea ardentia sine fine.
Nam multa cognovimus quæ non
consumuntur in flammâ ; ut pelles
Salamandræ, talk, & hujusmodi quæ
adjuncto aliquo inflammantur & lu-
cent, sed non comburuntur imo pu-
rificantur. Præter verò hæc sunt alia
stupenda naturæ. * Nam soni velut
tonitrus, & coruscationes possunt fie-
ri in aëre; immo majori horrore quã
illa quæ fiunt per naturam. nam mo-
dica materia adaptata, scilicet ad quan-
tatem unius pollicis, sonum facit
horribilem & coruscationē ostendit
vehementem. & hoc fit multis modis;
quibus civitas, aut exercitus destruat
ad modū artificij Gedeonis, qui lagun-
culis fractis, & lampadibus, igne exsi-
liente cum fragore inæstimabili, infi-
nitū Midianitarū destruxit exercitum
cū trecētis hominibus. Mira sunt hæc,
si

si quis sciret uti ad plenum in debitâ
 quantitate & materiâ. De alio verò
 genere sunt multa miranda; quæ licet
 in mundo sensibilem utilitatem
 non habeant, habent tamen specta-
 culum ineffabile sapientiæ; & possunt
 applicari ad probationem omnium
 occultorum, quibus vulgus inexper-
 tum contradicit: & sunt similia attra-
 ctioni ferri per magnetem. nam quis
 crederet hujusmodi attractioni nisi
 videret? Et multa miracula naturæ
 sunt in hac ferri attractione quæ non
 sciuntur à vulgo, sicut experientia do-
 cet sollicitum. Sed plura sunt hæc &
 majora. Nam similiter per lapidem
 fit auri attractio, & argenti, & omniū
 metallorum. Item lapis currit ad * a-
 cetum: & plantæ adinvicem, & par-
 tes animalium divisæ localiter, natu-
 raliter concurrunt. Et posteaquam hu-
 jusmodi perspexi, nihil mihi difficile
 est ad credendum, quando bene con-
 sidero, nec in divinis, sicut nec in hu-
 manis. Sed majora his sunt: non tota
 pote-

*Plin. hist.
 lib. 36.
 cap. 20.*

*
*Al. acer-
 gum.*

potestas mathematica non potest nisi instrumentū Sphæricū juxta artificiiū Ptolemæi in 8. Almagesti, in quo omnia quæ sunt in cœlo suis longitudinib. & latitudinib. essent descripta veraciter: quod autē moverentur naturaliter motu diurno nō est in mathematicā potestate. Experimentator tamē fidelis & magnificus, ad hoc anhelat, ut ex tali materiā fieret, & tali artificio, quod naturaliter cœli motu diurno volveretur: quod fieri videtur possibile. quoniam multa motu cœlestiū deferuntur, ut cometæ, & mare in fluxu, & alia in toto, vel in partibus suis. quod esset majus miraculū quam omnia prædicta, & majoris utilitatis quasi infinitæ. Nam tunc omnia instrumenta astronomiæ cessarent tan specialia quàm vulgata: nec thesaurus unius regis vix posset huic comparari. Et licet non quantum ad miraculum, tamen quantum ad utilitatem publicam & privatam, majora possunt fieri: scilicet ut auri copia & argenti deduca-

ducatur in medium, quantum placet homini, non tamen secundum naturæ possibilitatem, sed secundum artis complementum: * quum sint decem & septem modi auri, octo scilicet ex admixtione argenti cum auro. Et primus modus sit ex 16. partibus auri cum aliquibus partibus argenti, usque ad vigesimum quartum gradum auri pertingatur; cum uno argenti semper unum gradum auri augmentando. Et totidem sunt ex admixtione æris cum auro! ita ultimus modus sit ex viginti quatuor gradibus auri puri, sine admixtione alterius metalli: & non potest natura ulterius procedere sicut experientia docet. Sed ars potest augmentare aurum in gradibus puritatis usque in infinitum; similiter argentum complere potest sine fraude. Sed præcedentibus majus est, quòd licet anima rationalis cogi non potest, eò quod liberrate gaudet arbitrij: tamen efficaciter disponi, & induci, & excitari potest, ut gratis velit suos mo-
res

res mutare, & affectiones, & voluntates, secundum arbitrium alterius; & non solum singularis persona, sed totus exercitus, & civitas, & totus populus regionis. & hujusmodi experientiam docet Aristoteles in libr. secret: tam de regione, quam de exercitu. & personâ singulari. Et in his ferè est finis naturæ & artis.

CAPUT VII.

De retardatione accidentium senectutis, & de prolongatione vitæ humanæ.

SED ultimus gradus in quem potest artis complementum, cum omni naturæ potestate, est prolongatio vitæ humanæ in magnū tempus. quod autem hoc sit possibile, multa experimenta docuerunt. Nam Plinius recitat, Pollionem strenuum corpore & animo ultra ætatem hominis consuetā durasse in suā probitate, quæ quum Octavius Augustus interrogaret quid faceret

Lib. 22.

cap. 24.

faceret ut diu sic viveret: respondit in ænigmate quod oleum posuit exterius, & mulsum interius. (Mulsum autem habet octo partes aquæ & novem mellis secundum auctores) Et postea similia multa contigerunt. Nam rusticus effodiens in campis cum aratro, invenit vas aureum cum liquore. & existimans rorem cœli, lavit faciem, & bibit: & spiritu, & corpore & bonitate sapientiæ renovatus, de bubulco factus est bajulus regis Siciliæ; quod accidit tempore regis Wilhelmi. Et probatum est testimonio literarum papalium, quod Almannus quidē captivus inter Saracenos recepit medicinam, qua usque ad quingentos annos vitam suam prolongavit. Nam rex qui ipsum habuerat captivum, recepit regis magni nuncios cum hac medicinâ, sed quia eos habuit suspectos, voluit probare in captivo quod fuerat ei delatum. Ac domina de Nemore in Britania majori, quærens cervam albam, invenit unguentum quo
custos

custos nemoris se perunxerat in toto corpore, præterquam in plantis : vixit trecentis annis sine corruptione, exceptis pedum passionibus. Et pluries experti sumus in nostris temporibus, quod homines rurales sine consilio medicorum, vixerunt centum annis vel circiter satis sanè. Hæc etiam confirmantur per opera animalium, ut cervi, & aquilæ, & serpentis, & multorum, quæ per virtutem herbarum & lapidum, suam renovant juventutem. Et ideo sapientes dederunt se ad hujusmodi secretum, excitati exemplis brutorum, existimantes quod possibile fuit homini, quod brutis animantibus est concessum. Propter quod Artesius, suâ sapientiâ secretas vires animalium, & lapidum, & herbarum, & cæterarum rerum scrutatus, ob secreta naturæ scienda, & maximè propter vitæ prolongationem ; * gloriatur se vixisse mille & viginti quinque annos. Et possibilitas prolongationis vitæ confirmatur per hoc, quod homo est

*Aliser
gandet.*

D

natu-

naturaliter immortalis, id est potens non mori. atque etiam post peccatum potuit vivere circiter mille annos; & deinceps paulatim abbreviata est vitæ longitudo. Ergo oportet quod hujusmodi abbreviatio sit accidentalis: quare poterit in toto, vel in parte reparari. Sed nos, si velimus causam accidentalem hujusmodi corruptionis investigare; inveniemus quod non est à cœlo, neque ab alio quā defectu regiminis sanitatis. Nam in hoc quod patres corrupti sunt, generant filios corruptæ complexionis & compositionis, & filij eorum eadem de causâ se corrumpunt: & sic derivatur corruptio à patribus in filios, donec invaleseat continuū abbreviatio vitæ. Non tamen propter hoc sequitur quod abbreviabitur semper in minus, quia terminus in specie humana positus est, ut in pluribus vivant homines 80. annis, sed amplior est eorum labor & dolor. Remedium vero esset contra corruptionem propriam
cujus-

cujuslibet, si quilibet exerceret regimen completum sanitatis à juventute, quod consistit in his quæ sunt cibus & potus, somnus & vigilia, motus & quies, evacuatio & retentio, aër, passio animi. Nam si quis hoc regimen observaret à nativitate, viveret quantum natura assumpta à parentibus permetteret & duceretur ad ultimum terminum naturæ [lapsæ ab originali justitiâ] quem tamen præterire non posset : quia hoc regimen non confert, aut modicum, contra corruptionem antiquam parentum. Sed quasi impossibile est, quod homo sic regatur in omni mediocritate istorum, sicut exigit regimen sanitatis. & ideo oportet, quod abbreviatio vitæ contingat ex hac causâ, non solum ex corruptione parentum. Ars verò medicinæ determinat hoc regimen sufficienter. Sed nec dives, nec pauper, nec sapiens, nec insipiens, nec ipsi medici quantumcunque perfecti, possunt hoc regimen in se, nec in

*Defuit in
alio exempli*

* alijs perficere, ut patet cuilibet. * Sed natura non deficit in necessarijs, nec ars completa: immo valet insurgere & irrumperere contra accidentales passiones, ut in parte vel in toto delectantur. Et in principio quando inceperat ætas hominū declinare, facile fuisset remedium: sed nunc à quinque millibus annis & plus, difficile est remedium apponere. Sapientes tamen moti considerationibus prædictis, nisi sunt vias excogitare, non solum contra defectum proprii regiminis cujuslibet, sed contra corruptionem parentum: non quod reducatur homo ad vitam Adæ, vel Artesij propter corruptionem invalescentem: sed ut per centenarium annorum, vel plures vita prolongetur ultra communem ætatem hominum nunc viventium, quatenus passiones senectutis retardarentur, & si omnino prohiberi non possunt, mitigarentur: ut ultra communem æstimationem hominum vita prolongetur utiliter: semper tamen
citra

circa ultimum terminū naturæ. Nam terminus naturæ est ultimus, qui in primis hominibus positus est post peccatum : & alius est terminus cujuslibet ex propriâ parentum corruptione. Ultra istos ambos non contingit transire, sed bene terminum propriæ corruptionis. Nec tamen usque ad terminum primum credo quod aliquis quantumcunque sapiens est his temporibus posset attingere; licet possibilitas sit, & aptitudo naturę humanæ ad illum terminum qui fuit in primis hominibus. Nec mirum est quom aptitudo ista se extendat ad immortalitatem, sicut ante peccatum fuit, & erit post resurrectionem. Sed si tu dicas quod nec Aristoteles, nec Plato, nec Hippocrates, nec Galenus, ad hujusmodi prolongationem pervenerunt: respondeo tibi, quod nec ad multas veritates mediocres, quæ postea scitæ sunt per alios studiosos: & ideo hæc maxima potuerunt ignorare, quam ad hæc laboraverunt. Sed ni-

D ;

mis

mis in alijs se occupaverunt, & citius perducti sunt ad senectutem, consummentes vitam in pejoribus & vulgaris, quam vias ad hæc secreta magna perciperent. Scimus enim quod Aristoteles dicit in prædicamentis, Quod quadratura circuli possibilis est, nondum tamen scita. Et sic fatetur se & omnes usq; ad tempus suum ignorasse. Sed nos scimus his diebus quod scitur hæc veritas, & ideo longè magis poterat Aristoteles ulteriora naturæ secreta ignorare. Multa etiam modo ignorant sapientes quæ vulgus studentium sciet in temporibus futuris. Unde hæc objectio vana est per omnem modum.

CAPUT IIX.

*De occultando secreta naturæ
& artis.*

ENumeratis quibusdam exemplis circa naturæ & artis potestatem, ut ex paucis multa colligamus, ex partibus

bus tota, ex particularibus universalia, quatenus videamus quod non est necesse nobis aspirare ad magicam, cum natura & ars sufficient: volo modo per ordinem singula prosequi, & causas, & modum dare in particulari. Sed considero quod in pellibus caprarum & ovium non traduntur secreta [natura] ita ut à quolibet intelligantur, sicut vult Socrates & Aristoteles. Ipse enim dicit in secretis secretorum, quod esset fractor sigilli celestis qui communicaret secreta naturæ & artis; adjungens quod multa mala sequuntur eum, qui occulta detegit & arcana revelat. Cæterum in hoc casu dicit A. Gellius lib. noctiū Atticarū de collatione sapientū quod stultū est asino præbere lactucas, quum ei sufficient cardui. Atq; in libro lapidum scribitur quod rerum minuit majestatem, qui divulgat mystica: nec manēt secreta quorū turba est conscia. Ex divisione n. probabilis patet vulgus *Rep. 1. cap. 2.* dividi in oppositum contra sapien-

tes. Nam quod videtur omnibus est verum, & quod sapientibus similiter, & maximè notis. Ergo quod pluribus, hoc est vulgo in quantum hujusmodi videtur, oportet quod sit falsum. de vulgo loquor, quod contra sapientes in hac divisione distinguitur. Nam in communibus conceptionibus animi concordat cum sapientibus, sed in proprijs principijs & conclusionibus artium & scientiarum à sapientibus discordat, [laborans circa apparentias in Sophismatibus] subtilitatibus, & de quibus sapientes non curant. In proprijs igitur vel secretis vulgus errat; & sic dividitur contra sapientes; sed in communibus animi conceptionibus, sub lege omnium continetur, & cum sapientibus concordat. Communia verò pauci sunt valoris, nec sunt propter se quærenda, sed propter particularia & propria. Sed causa hujus latentiae vulgi fuit apud omnes sapientes, quia vulgus deridet sapientes, & [negligit] secreta sapientiae, & nescit uti rebus

rebus dignissimis: atq; si aliquod magnificum cadat in ejus notitiam à fortunâ, illud pervertit, & eo abutitur in damnum multiplex personarum atque communitalis. Et ideo insanus est qui aliquod secretum scribit nisi ut à vulgo celetur, & vix à sapientibus & studiosissimis possit intelligi. Sic currit tota sapientū multitudo à principio, & multis modis occultaverunt à vulgo sapientiæ secreta. Nam aliqui per characteres, & carmina occultaverūt multa, alij per verba ænigmatica & figurativa, ut Aristoteles dicit in lib. Secretorum. O Alexander, volo tibi ostendere secretorum maximum, & divinâ potentiâ juvet te ad celandum arcanum, & perficiendum, propositum. Accipe igitur lapidem, qui non est lapis, & est in quolibet homine, & in quolibet loco, & in quolibet tempore: & vocatur ovum philosophorum, & terminus ovi. Et inveniuntur in multis libris & scientijs innumerabilia, talibus sermonibus ob-

scurata, ut nemo intelligat sine doctore aliquo. Tertio occultaverunt per modos scribendi, scilicet per consonantes tantum, ut nemo sciat legere, nisi sciat significata dictionum, sicut Hebræi, & Chaldæi, & Syri, & Arabes scribunt secreta, imo quasi omnia pro majori parte sic scribuntur: & ideo magna est sapientiæ occultatio apud eos, & maximè apud Hebræos: quoniam Aristoteles dicit in libr. memorato, quod Deus dederit ijs omnem sapientiam antequàm fuerunt Philosophi, & ab Hebræis omnes nationes habuerunt philosophiæ principium. Et Albumasar in libro introductorij majoris, & alij philosophi, & Josephus primo & octavo libro Antiquitatum hoc manifeste docet. Quarto accidit occultatio per mixtionem literarum diversi generis. Nam sic Ethicus Astronomus suam sapientiam occultavit, eò quod literis Hebræis, Græcis, & Latinis eam conscripsit in eadem serie scripturæ. Quinto occul-

tave-

taverunt quidā per alias literas quam sunt apud gentem suam, aut quam sunt apud alias nationes, sed * fingunt eas pro sua voluntate; & hoc est maximum impedimentum, quo usus est Artefius in libro suo de secretis naturæ. Sexto fiunt non figuræ literarum sed aliæ figuræ geometricæ quæ secundum diversitatem punctorum & notarum, habent literarum potestatem, & istis similiter usus est Artefius in sua scientiâ. Septimò est majus artificium occultandi quod dicitur ars Notoria, quæ est ars notandi & scribēdi eā brevitate qua volumus, & eā velocitate qua desideramus. Et sic multa secreta scripta sunt in libris Latinorum. Necessarium verò existimavi has occultationes tangere: quia forsan propter secretorum magnitudinem his utar modis, ut sic saltem te juvem ut possim.

CAPUT IX.

*De modo faciendi ovum Philosophorum.**In ali ad
marg.**Hæc sunt
anigmata.**Al. conter-
mina.**aliter me-
ancholia
atura.*

*

*liter. in-
sibile.*

DIco igitur tibi quod volo ordinatè
quæ superius narravi exponere, &
ideo volo ovum Philosophorum dis-
solvere, & partes philosophici ovi in-
vestigare: nam hoc est initium ad alia.
Calcem igitur diligenter aquis alkali,
& alijs aquis acutis purifica, & varijs
contritionibus cum salibus confrica,
& pluribus assationibus [concrema]
ut fiat terra pura liberata ab alijs ele-
mentis, quam tibi pro [meæ * longi-
tudinis staturâ] dignam dico. intel-
lige si potes. quia proculdubio erit
compositum ex elementis; & ideo e-
rit pars lapidis qui non est lapis, & est
in quolibet homine & in quolibet lo-
co hominis, & in quolibet tempore
anni reperies hoc in suo loco. Deinde
oleum ad modum crocei casei & vis-
cosi accipias, primo [ictu inseparabile]
cui tota virtus ignea dividatur, & se-
paretur per dissolutionem, dissolvatur
autem

autem in aquâ acutâ temperatâ acuitatis cum igne levî, & decoquatur quatenus separetur sua. [pinguedo] sicut *Aliter: ter-*
pinguedo in carnibus, per distillationem, ut non egrediatur aliquid deunctuositate, & hæc virtus ignea in aquâ *ristrietas.*
urinæ distillatur. Postea in aceto decoquatur, donec minimum quod inest de causâ adustionis deficcetur, & virtus ignea habeatur. Sed si non curetur de illâ [iterum] fiat: evigila & *Al. tum*
excute: nam sermo difficilis est. Oleum *fac.*
verò dissolvitur in aquis acutis, vel in oleo communi quod expressius operatur, [vel] in oleo acuto amygdalorum super ignem: ita ut oleum seperetur, & remaneat spiritus occultatus, in partibus animalium, & sulphure, & arsenico. Nam lapides in quibus oleum humiditatis superfluit, terminum habent in unione suarum partium: quoniam non est vehemens unio, quin possit unum ab alio dissolvi per naturam aquæ, quæ est subiectum liquefactionis in spiritu; qui *Al. ut.*
medi-

medium inter partes siccas & oleum est. Facta igitur dissolutione, remanebit nobis in spiritu, humiditas pura, vehementer permixta partibus siccis, quæ moventur in eâ, cum resolveret eam ignis, qui vocatur à Philosophis aliquando Sulphur fusibile, aliquando oleum, aliquando humor aëreus, aliquando substantia conjunctiva quam ignis non separat, aliquando Camphora: & si vis, istud est ovum Philosophorum, vel magis terminus & finis ovi. & pervenit ad nos de oleis istis, & inter subtilia reputatur, quando ab aquâ vel oleo in quo est purgetur vel separetur. Præterea corrumpitur oleum terendo ipsum cum rebus desiccantibus, sicut sale aut atramento: & assando. quoniam passio fit à contrario, & postea sublimetur donec ab [oleagineitate sua] privetur. Et quia est sicut Sulphur vel arsenicum in mineralibus, præparari potest sicut & ipsa. Melius est tamen ut decoquatur

quatur in aquis, temperatis in acuitate, donec purgetur & dealbetur. Quæ verò salutaris exaltatio, fit in
 * igne sicco vel humido: & iteretur distillatio, ut effectum bonitatis recipiat sufficienter, donec rectificetur: rectificationis cuius novissimæ signa, sunt candor & cristallina serenitas, & cum cætera nigrescunt ab igne hoc albescit, mundatur, serenitate nitescit, & splendore mirabili. Ex hac aquâ & terrâ suâ, argentum vivum generatur quod est sicut argentum vivum in mineralibus. & [quando incanduit hoc modo materia] congelatur. Lapis verò Aristotelis qui non est lapis, ponitur in pyramide loco calido vel (si vis) in ventrem equi vel bovis : & febrem acutam imitatur. nam de septem in 14. & de hoc in 21. aliquando procedit: ut feces elementorum dissolvantur in aquâ suâ, antequam separentur; & multoties iteretur dissolutio, & distillatio, donec rectificetur. Et hic est finis
 hujus

*Al. quando
 dog₃ in sa-
 lem arma-
 niacum.*

hujus intentionis. Scias tamen, quod quum consummaveris, tunc oportet te incipere.

Aliud verò secretum volo tibi dicere. Nam argentum vivum præparabis mortificando ipsum cum vapore stanni pro margaritis, & cum vapore plumbi pro lbero lapide, deinde teratur cum rebus desiccantibus, & atramentis; & hujusmodi (ut dictum est) & affetur: deinde sublimetur: *
Al. septies. si ad unionem; duodecies; si ad rubedinem [21] donec in eo humiditas omnino corrumpatur. Nec est possibile, quod humiditas ejus separetur per vaporem, sicut oleum antedictum: quia vehementer est permixta partibus suis siccis; nec terminum constituit, sicut dictum est in metallis prius dictis. In hoc capitulo decipieris, nisi significata verborum distinguas. Tempus est tertium involvi capitulum: ut calcem [calcem corporis] quod intendis acquiras. Corpus verò calcinatur quando appodiatur, hoc est, ut
 humor

*l. clavam
cris.*

humor in eo corrumpatur per salem,
 & sale armoniaco, & aceto, & quan-
 doque rebus adurentibus, & cum Sul-
 phure & arsenico : & quandoque ci-
 bantur corpora argento vivo, & subli-
 matur ab ijs donec remaneant putris
 * Sunt igitur claves artis, Congelatio,
 resolutio, inceratio, proportio. Sed a-
 lio modo purificatio, distillatio, sepa-
 ratia, calcinatio, & fixio : & tum potes
 quiescere.

CAPUT X.

De eodem, sed alio modo.

* **T**Ransactis annis Arabum sexcen-
 tis & duobus, rogasti me de qui-
 busdam secretis. Accipe igitur lapi-
 dem, & calcina ipsum afflatione levi,
 & contritione forti, sive cum rebus a-
 cutis. Sed in fine parum commisce
 cum aquâ dulci : & medicinam laxa-
 tivam compone de septem rebus (si
 vis) vel de sex, vel de quinque, vel de
 quot vis, sed quiescit animus meus in
 duabus rebus: quarū proportio melior

Forte 629.

*

E

est

est in sesquialterâ proportionē, vel circiter, sicut te docere potest experiētia. resolve tamē aurum ad ignem & [melius cola] sed si mihi credas, accipias rem unam, hoc est secretum secretorū naturæ potens mirabilia. Mixto igitur ex duobus, aut ex pluribus, aut Phœnice, quod est animal singulare [ad ignē] & incorpora per fortem motum: cui si liquor calidus quater, vel quinques adhibeatur, habebis ultimū compositum. Sed postea cœlestis natura debilitatur, si aquam infundis calidam ter vel quater. Divide igitur debile à forti, in vasis diversis, si mihi credis: evacuatō igitur quod bonum est. Iterū adhibe pulverem, & aquam quæ remansit diligenter exprime: nam pro certo partes pulveris deducet, non incorporatas: & ideo illam aquā per se collige: quia pulvis exsiccat ab eā habet incorporari medicinæ laxativæ. fac igitur ut prius, donec forte à debili distinguas: & ter, vel quater, vel quinques, vel plus, [pulverem] adhibeas: & semper uno

uno modo facias. Et si cum aquâ calidâ operari non poteris, fac aquâ alkali, & per huiusmodi acuta, medicinæ facies violentiam. Si autem propter [a- *Al. duritiem aut,*
cuitatem &] mollitiē medicinæ, frangatur, pulvere appposito, appone cautè plus de duro & molli. Si verò propter abundantiam pulveris, appone plus de medicinâ. Si verò propter fortitudinē aquæ, rigua cum pistillo: & congrega materiam, ut potes: & aquam separa paulatim, & redibit ad statum; quam aquam exsiccabis: nam continet pulverem & aquam medicinæ, quæ sunt incorporanda sicut pulvis principalis. Non dormias hîc, quia valde utile & magnum continetur secretum. Si verò partes virgulti coryli aut salicis, iusta rerum serie aptè ordinaveris, unionem naturalem servabunt: & hoc non tradas oblivioni, quia valet ad multa. Citrinitatem verò cum unione factâ miscebis: & exurget ut credo simile lapidi Ibero, & proculdubio mortificat quod mortificatum est per vapo-

rem plumbi. Invenies plumbum, si exprimas vivum à mortuo: & mortuum sepelies in olibano & sarcocollâ. Tene hoc secretum. Nam nonnullius est utilitatis. Et idem facias cum vapore margaritæ vel lapidis Tagi, & sepelias mortuum ut dixi.

CAPUT XI.

De eodem tamen alio modo.

Forle 603.

ANnis Arabum [630.] transactis, petitioni tuæ respondeo in hunc modum. Oportet te habere medicinam quæ dissolvatur in liquefacto, & immergatur in eo, & penetret interiora ejus, & permisceatur cū eo: & nō sit servus fugitivus, & transmutet ipsum. Ratione verò spiritus permiscetur: & per calcem metalli figitur. Æstimatur autē quod fixio præparatur, quando corpus & spiritus in suo loco ponuntur, & sublimantur: & totiens fiat, ut corpus fiat spiritus, & spiritus fiat corpus. Accipiatis igitur de ossibus Adæ, & de calce sub eodem pondere: & sint sex

sex ad lapidem Tagi, & quinq; ad lapidem unionis: & terantur simul cum aquâ vitæ, cujus proprium est dissolvere omnes res alias, ita quod in ea dissolvantur & assentur. Et iteretur multotiens contritio & assatio, donec incerentur; hoc est uniantur partes, sicut in cerâ. Et signum incerationis est, quod medicina lique scat super ferrum valde ignitum. Deinde ponatur in eadem aquâ in loco calido & humido, aut suspendatur in vapore aquarum valde calidarum; deinde dissolvantur, & congelentur ad Solem. Deinde accipias salem petræ, & argentū vivum convertes in plumbum, & iterum plumbum eo lavabis & mundificabis ut sit proxima argento, & tunc operare ut pius. Item pondus totum sit 30. Sed tamen salis petræ LURU. VOPO Vir Can Vtriet Sulphuris; & sic facies tonitrū & coruscationem, si scias artificium. Videas tamen utrum loquar in ænigmate vel secundum veritatem. Et aliqui existimaverunt aliter. Nam di-

ctum est mihi quod debes omnia resolvere in materiam primam, de qua habebis ab Aristotele in locis vulgatis & famosis : propter quod taceo. Et cum istam habueris, tunc habetis pura elementa simplicia & æqualia : & hoc facies per res contrarias, & varias operationes, quas prius vocavi claves artis. Et Aristoteles dicit, quòd æqualitas potentiarum excludit actionem, & passionem, & corruptionem. Et hæc dicit Averrhoes, reprobando Galenum. Et hæc existimatur simplicior medicina quæ reperiri potest, & purior : & quæ valet contra febres, & passionem animi, & corporum. Vale. Et quicumque hæc reseraverit, habebit clavem quæ aperit, & nemo claudit : & quum clausit nemo aperit.

Explicuit Epistola Baconis de secretis nature & artis, & de nullitate magicæ

[Ad Gulielmum Parisiensem conscripta.]

AD BACONIS EPI-
STOLAM ADNOTATA.

CAPUT I.

AUt consensu multa mortalibus proponunt miranda.] Consensus plurima potest : neq; in illis tantum, quæ præstigiatores nequam mentiuntur, sed in rebus etiam utilibus & magni momenti, quas non stupidum tantummodo vulgus admiratur, sed quibus & scioli magicas subesse fraudes arbitrantur. Hinc Tritemij Steganographia tota dependet, quam hinc illum hausisse suspicor. Et licet eam multum excoluerit & amplificavit Tritemius, hic tamen jacta esse Steganographia fundamēta certissimū est, quod ex capitibus sequentibus & maxime octavo latius patet. Priorum duorum librorum (ut hoc obiter moneam) clavis vera est Polygraphia, qui intelligit mecum sentit : tertium ista Baconis epistola referat. Atque utinam Sigismundus qui pro Tritemio Apologiam scripsit, hoc mihi credat, neq; enim dubito quin pro ejus ingenio facile intelligat, & de tertio illo libro hesitare desinat. Sed ut pro Tritemio semel respondeam in quo Libavius sæpenumero desipit, aio Tritemij magiam : qua in universā Steganographiā cōtinetur ; non esse aliam, quam modum quendam artificiosum celandi arcanum, quodcunq;, ut solis artem una scientibus innotescat. P. S.

Facilius enim à Deo impetrandum foret vel à bonis spiritibus.] Si per spontaneam carnis afflictionem immundus spiritus infunditur : quanto uberius quis per vitæ mundiciem, mundi spiritus particeps fieri possit ? Ingemuit Rabbi Echina ista proferens, ut habetur apud Paulum Ricium super 56. præceptum negativum. J. D.

CAPUT II.

Super ferreum condens.] Caput reo obnubitur, & nudis pedibus per novem candentes vomeres lustralibus precibus incantatos, & in incertâ distantia positos ducitur; quos si indemnis transferit absolvitur. Hoc probationis genus *Ardelium* dicitur, quo matris suæ castitatem explorare voluit, & oculos interim spectacula pascere sustinuit imprudens rex & in matrem impius *Eduardus*, *papistis sanctus* & *Confessor* dictus: ut habent scriptores *historiæ Britannicæ*.

P. S.

Et quicumque dicunt quod *Solomon*.] Præter hujusmodi libros & illos qui infra cap. 3. recensentur: multi à *Tritemio* enumerantur in *Antipala maleficiorum*. si libet ibi quærere. P. S.

Vel sunt facti ad vultus stellarum.] De his optimè scripsit sapiens *Picatrix*. & si inutilia quedam amputarentur, dignissimus esset ille liber qui lucem aspiceret. P. S.

Vulgus mathematicorum.] Non hîc scientiam ipsam, sed hominum imperitiâ damnat. Ipse enim cap. 16. tertij operis quod scripsit in opus majus & minus ad *Clementem Pontif. Rom.* ait sine mathematicâ nihil dignum sciri potest in philosophiâ: ut ostendi in quariâ parte operis majoris multum diffuse. J. D.

CAPUT III.

Qui nec artis, nec naturæ continent potestatem.] Quamvis & magnâ Dei misericordiâ factum sit ut plurimi hujus fermenti libri à spurcis confecti nebulonibus jam tenebris sepulti jaceant: intimè tamen dolendum est ejusmodi quotidie prodire libros, qui specioso argumento maximarum rerum agnitionem promittunt; in quibus tamen capiti lectores, nihil præter scripturientium ambitionem & fraudes

des deprehendunt. Et si per communem utilitatem facere
 liceret, tacita hîc præterissem qua scripsit Andreas Liba-
 vius De azotho, de mercurio, & lap: philosophorum, &
 varijs eius processibus. - Siluissem etiam de eius Heptade
 quamdiu illa commenta modesto Divinationum titulo sese
 defenderent. Sed quia jam non amplius Divinationes ha-
 benda sunt illa annotata, sed quæ juniores scire debent phi-
 losophemata ex fundamentis ipsis [De podagra Scheune-
 manni in calce def: Syntag.] quia in Novi luminis auctore; si
 is est quæ vult Libavius Michael Sedinrogius, de quo tamen
 si vir bonus & honestus esse desiderasset tacuisse debuit [No-
 lu. Chy. præf. in enig.] quia inquam in illo impegit, à quo
 ad veram philosophiam prima mihi janua aperta est, o be-
 ne illi sit & vivo, & mortuo! & ita impegit, ut divinum
 eius scriptum, si Libavij Divinationes attendas, prorsus in-
 utile effectum sit: quia etiam id ipsum à fraternitate R. C. po-
 stulat ut catalogum suum chymicorum scriptorum quam-
 primum edant: ego tibi Libavi salvo eorum judicio pro fra-
 tribus respondeo, & omnes qui tecum desipere nollent sedu-
 lo admoneo, ut à prænominatis tuis scriptis diligenter cavè-
 ant; in quibus ne obscura quidē veritatis umbella apparet,
 quæ sensum philosophorum, & secretum quod ipsi adinve-
 nerunt attingat, quatenus inquam à suo cerebro profecta
 sunt, & non aliunde mutuata. Possent quidem Alchy-
 mia & Syntagma si nimia loquacitas, si superbia, & maledi-
 centiæ virus abessent, à junioribus utiliter legi: sed cavete
 vos qui errare non vultis, à lapide philosophorum quem Li-
 bavius descripsit, & ignorat tamen. Sed ut istiusmodi
 hominibus æquior sim; faciunt nostra, faciunt etiam ma-
 gnorum auctorum errata communia. Et ut non abeam
 longius quid huic ipsi Baconi in naturâ aut arte persuade

re potuit ut equas sine equo gravidas fieri adeo crediderit, ut etiam in argumentum emissionis specierum & virtutum adduxerit? Solinū excusabit infantia, Plinium etiam scriptorem optimum & solertissimum nimia credulitas, quæ hanc fabulam ad illa hominum monstra [lib. 7. cap. 2.] ablegabit. De prodigiosa hominum quorundam Merlini & aliorum conceptione, ex humano tamen semine spirituum fraude surrepto, alia ratio est, sed non est huius loci. De Philippo Theophrasto quid dicam, adhuc non habeo. Sed quum apud D. Iohannem Montanum quereretur quod tam præclara medicina theórica, tam formis nixa radicibus, praxis & recepta aliquando parum feliciter responderent; insit illud ipsum sibi contigisse nonnunquam quum primò recepta illa attentaret, quæ tamen postea verissima esse deprehendit. Et qui bene perpenderit quibuscum hominibus Theophrastus conflictaretur, facile existimet illum scientiam suam dissimulasse sapius, ne quam illi gloriam præriperent adversarij, sibiipsis immerito vendicarent. P. S.

CAPUT IV.

Nam instrumenta navigandi &c.] Multa huiusmodi instrumenta apud Anglos olim inventa dicuntur. Et enim & Thomas Nortonus; cuius etiam liber de motu perpetuo extare dicitur, & pro ingenti thesauro clam possideri; in huiusmodi Scaphâ solus sedens legisse aut scripsisse perhibetur, & quanta visum est velocitate moveri. Apud Sudsexios etiam Horsingtonus quidam molendinum seipsum movens struxisse fertur. Vidimus etiam & ipsi dum Londinî iteremus inventum quoddam bellicum, machinis intus inclusis agendum, sive in terrestri itinere sive aquatico. Dederunt anni sequentes cymbam quæ aquis fere tota immersa recurreret, & cum celonibus Londinensibus expeditissimis veloci-

velocitate certaret, quam nec aquarum moles submergeret, nec ventorum impetus retardaret. P. S.

Ad elevandum pondera.] Id autem cochleâ quam vocant continuam sive perpetuam facile præstat. P. S.

Instrumenta ambulandi in mari.] Huiusmodi usi sunt Virginia nuperi coloni ad conchas margaritiferas expiscandas.

Pontes ultra flumina.] Sabere forte an & lignis levioribus intertextis. P. S.

CAPUT V.

Longissimè posita appareant propinquissima.] Permagnâ animorum voluptate tubos illos speculares usurpant docti & indocti. Hinc tamen videre licet instrumenta perspicua his longè præstantiora Baconi fuisse, qui talia de illis predicare posset. Quæ autem scientiæ perspectiva præstantia sit, audi ipsum Baconem in opere tertio ad Clem. Pont. cap. 17. Necesse est omnia sciri per hanc scientiam, quia omnes actiones rerum sunt secundum specierum & virtutum multiplicationem ab agentibus in materias patientes. Et leges huiusmodi multiplicationum non sciuntur nisi à perspectiva, nec alibi sunt traditæ ad nos: cum tamen non solum sint communes actioni in visum, sed in omnem sensum, & in totam mundi machinam, & in cœlestibus, & inferioribus. Magnam idcirco gratiam jure merito habemus Johanni Combachio literatissimo viro, cujus opera effectum est, ut Perspectivæ Baconis & Speculæ publicè veneant. P. S.

Nam Socrates draconem.] Hoc habetur in quarta capite libri secundi Aristotelis de proprietatibus elementorum. J. D.

CAPUT VI.

Soni velut tonitrus & coruscationes.] *Miranda*
sciolorum audacia, qui id sibi assumunt, ut de rebus o-
 nibus quantumvis incognitis sententiam ferant. Argu-
 mento potest esse Libavius, qui ab hoc loco Rogerij auctori-
 tem ita elevat [De philosophiâ magicâ fratrum R. C. pag.
 11.] ut cum insanis bibaculi cujusdam insomnijs, qui ad
 turcam debellandū vix unâ æstate opus esse arbitrabatur,
 reaclara eius inventa, aut ut minimum dicam experimen-
 compararet. Si hæc cum reliquis contulisses Andrea,
 venisses pulverem tormentarium hic indicari cujus qui-
 em & compositio Baconi innotuerat, & usus, idq; ultra
 tantum annos priusquam ignotus Polydoro auctor illum in
 vulgus extulerat. Et quamvis experientia humana vitæ
 lutare inventum fuisse comprobarit, manifestum tamen
 est, ideo homines pulverem hunc celasse Baconem, quod il-
 multa exinde mala ominaretur. Et certè te demiror Li-
 vi qui in scriptis aliorum videri vis elephantio nasutior
 e pulverem illum sulphureum non olfecisse. Adscribi-
 r hisce insanis Burgravius. Ipse si vivit, si libet, respondeat.
 usim interim affirmare, pluris esse curationem Burgravij
 agneticam, quàm omnes Andrea Libavij Divinationes.
 hoc submoneo ut animal confectum sepeliatur, alias post a-
 quot dies, morti nonnulli redirent. P. S.

Lapis currit ad acetum.] *Vide Albertum de La-*
de aceti lib. 2. de mineralibus cap. 6. f. D. Non videtur
 men Albertus id velle quod hoc loco Rogerius, qui illum
 tius lapidem innuit, qui in speculo aut levigatâ aliqua su-
 rficie positus, insperso aceto movetur, ut palea quæ ceru-
 ine lita, & in aquâ placidam injecta discurrit; atq; id-
 eo ab Italis pietra caminante nuncupatur. P. S.

Decem

Decem & septem modi auri.] Tabula 7. D. 17.
modorum ligatura ☉ cum ☽ & ♀.

gradus					
☽	☉	auri.		♀	☉
8	16	1	9	8	16
7	17	2	10	7	17
6	18	3	11	6	18
5	19	4	12	5	19
4	20	5	13	4	20
3	21	6	14	3	21
2	22	7	15	2	22
1	23	8	16	1	23
aurum			17	purum.	
			24		

CAPUT VII.

De retardatione accidentium senectutis.] Extat
Baconis libellus de accidentibus senectutis excusus Oxoni
ubi & illa quæ hoc capite & plura etiam ad hoc argumen
tum spectantia plenius recensentur. P. S.

Sed natura non deficit in necessarijs &c.] Nimi
um ridiculi Libavio videntur R. C. fratres qui vitam lon
gam & sanam pollicentur & pleniorum rerum cognitionem
Magica hæc vult esse deliramenta quibus ipsi placide indor

miscant. Licuit tamen illi non hinc tantum sed ex omnibus fere philosophorum & hymicorum scriptis animadvertisse, nec solos, nec primos fratres illos talia scripsisse. P. S.

CAPUT IIX.

Fingunt eas pro sua voluntate.] Vide super bis Baptistam Portam De furtivis literarum notis, vide etiam Tritem: Polygr: lib. 6. & usum earum in eo libro, cui titulus Synoufiastes eiusdem Tritemij. P. S.

CAPUT IX.

Pro melancholiâ staturæ.] Vide librum meum supra Portam Avicenna, ubi melancholia, pro calce sive terrâ intelligitur. J. D.

In igne sicco vel humido.] Utuntur philosophi omni ignium genere; quos omnes suo tempore, ut decet adhibere, totum lapidis artificium continet. Hic est autem ille ignis Pontani, humidus interius, & extra siccus, obscurus, & intellectu difficilis. P. S.

Si ad unionem duodecies, si ad rubedinem xi.] Unum (inquiunt philosophi) opus est, unus operandi modus tam ad album, quam ad rubeum: addo etiam una materia; eaq; non simplex, sed ex duobus composita cum suo intermedio, quod æsuper in binario erit ab infra senario. P. S.

Sunt igitur claves artis congelatio &c.] Alchymia est speculativa, & practica. Speculativa est scientia de rerum generatione ex elementis, & de omnibus rebus inanimatis: ut de elementis, de humoribus simplicibus, & compositis; de lapidibus, communibus, de gemmis & marmoribus, de auro & cæteris metallis, de Sulphuribus; salibus, atramentis, de azurio, minio, & cæteris coloribus: de

de oleis & bituminibus ardentibus, & alijs infinitis. Est autem alchymia operativa & practica, qua docet facere metalla nobilia, & colores, & alia multa, melius & copiosius per artem, quam per naturam. Et hujus scientia est major omnibus precedentibus, quia majores utilitates producit. Nam non solum expensas, & alia infinita reip. potest dare, sed dat invenire alia quae vitam hominum possunt prolongare in multa tempora, ad quae per naturam produci non potest. Radices alchymiae speculativa ego posui secundum considerationem Avicennae, praecipue in expositione sexti praecepti in studio Theologiae. nam ibi texui totam rerum generationem ex elementis, & conatus sum certificare cum magna diligentia quicquid oportet ibi sciri, secundum vias alchymiae, & naturalis philosophiae, & medicinae. quae radices applicari debent ad omnium rerum generationem. Et hanc applicationem exposui in auro, & metallis ceteris, cum magno studio. Et meo judicio hac quae ibi tango de istis radicibus, cum applicatione ad metalla; valent longe plus quam quicquid aestimatur sciri ab omnibus naturalibus qui modò sunt: qui extra radices has in vanum quaerunt ramos, flores, & fructus. (Baco in opere 3. ad Clem. Pontif. cap. 18.) Claves ergo hic posita Congelatio &c. sunt alchymiae practicae potius quam speculativa. J. D.

CAPUT X.

Annis Arabum sexcentis & duobus.] Itaq; circa annum Domini 1205. A. Christo enim ad Machometi furores, intercesserunt anni 621. menses 6. dies 14. (Sic tradit Johannes Saxonicus in Commentario ad Alcabitij Isagogen, à Colinao impresso anno 1521. fol. 81. Alij autem rejciunt in annum Christi 630.) Annus autem Arabi-
cus

ebus 354. & singulis 30. annis accedunt
 ex minutis 44. quæ restant ex mensibus sy-
 9. dies 12. horas. Ergo anni Arabici 30. con-
 21. sive annos Julianos 29. & superant dies 38.
 igitur Arabici 602. efficiunt annos Julianos
 editus ad annos Domini 621. eveniunt anni
 eri ergo similis est Clementem illum papam,
 scripsit Rogerius, Clementem tertium fuisse
 ad papatum evectus est; quam quartum qui
 debat in cathedrâ pestilentia; nisi Rogerius
 erit. idq; amplius hinc licebit conijcere quod
 Robertus, & eximiam tum rerum, tum li-
 rum, & Hebraicarum cognitionem, Groste-
 m caput appellatus, Episcopus Lincolnensis
 designaretur, annis centum serius quam
 riternius nisi mendum est impresso-
 ris. J. D.

Δόξα ἐν ὑψίστοις Θεῷ.

